



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma : [Tir Yimyim](#) [tir\\_yimyim](#)

[tir yimyim](#) TAPAK 8

Iran-i nuclear nok-nü yanglutsü tebilemba mali: Tir Masoud

ATP rankings: Taylor Fritz maneni 4buba nung lir

VOL. XXII ISSUE NO. 243 (ADOK 243) DIMAPUR SANGTENNÜ (TUESDAY) AAMI (JUNE) 17, 2025 ₹ 5.00

## Mokokchung-ji nübur tangatetba agi ajungketa yanglur : Imkong L.Imchen

**Mokokchung, Aami/June 16 (TYO):** Mangmetonglar Telongjem Mokokchung Golden Jubilee Nünge Ki tanü Sangtemla Ward nung MLA & Advisor Soil & Water Conservation, IPR Govt. of Nagaland Wb. Imkong L. Imchen-i lapoktsüogo.

Mangmetonglar Telongjem Mokokchung 2019 küm Golden Jubilee amongba mapang nung jubileemoneremti Mokokchung nung Mangmetonglar Telongjem Golden Jubilee Nünge Ki ka asütsüta pangzüng takang renema ayu aser iba pangzüng dakji ajemdaker Mokokchung.

(Manen tapak 2 nung...)

## DPRK nung Indian ambassador inyaktsü Aliawati Longkumer shim

**New Delhi, Aami/June 16 (Agencies):** Democratic People's Republic of Korea (North Korea) nung India indang ambassador inyaktsü asoshi Aliawati Longkumer shimogo.

Pa ya tang Asuncion, Paraguay nung Embassy of India indang Charge d'affaires inyaktar aser mapang tatsüka tsüngta Ambassador of India to North Korea mapa agizüktüksü imlar.

"Aliawati Longkumer (YOA: 2008), tang Charge d'affaires a.i. Embassy of India, Asuncion, Paraguay inyaktar aser Ambassador of India to Democratic People's Republic of Korea inyaktsü shimogo. Pai mapang tatsüka tsüngta iba mapa agizüktüksü omlar," ta Ministry of External Affairs (MEA) ajanga Hombarnü sangdong ka nung ashi.

India aser North Korea tsüngta tesendaktep ya 'tembar, amalitep aser tangatetep' ta züngshia arur. North Korea den consular tesendaktep ya March 1962 nung amenok.

MEA ajanga ashiba agi, North Korea nung Consulate General of India ya 1968 küm amenok aser linük ana tsüngta sorkar tesendaktep ya Embassy level nung December 10, 1973 nung tenzük.



Aliawati Longkumer

Korean War 1950-1953 sülen United Nations-i 9-member Neutral Nations Repatriation Commission ka tentet aser yangji India mendenpuba shima liasü. Mendenpuba Major General K S Thimayya kubok POWs melentepba nung Commission-i shilem agiba kanga tushia agizüktüksü liasü.

Foreign Office Consultations (FOC) ajanga linük ana tsüngta ken o balala mapang shia lemsateper.

Taoba mapanga India-i North Korea dang nuclear aser ballistic missile tendangba nungi pila alitsü aser Korean Peninsula nung tensa ajemdaktsü aser yangshia liasü, ta MEA sangdong ka ajanga taoba mapang shia liasü.

Korean Peninsula nung tesunep aser yimjung bener arutsü merangba nung India-i lenmang balala nungi yaria arur.

## Nino Iralu-i Lokayukta mapa agizükogo

**Dimapur, Aami/June 16 (TYO):** Nagaland Civil Secretariat, Kohima nung aliba Conference Hall nung June 16, 2025 nü sentong ka ayongzüka Nino Iralu ya Nagaland indang Lokayukta tasenba ama tenangzüktep agiogo.

Nino Iralu yagi taoba mapang Nagaland indang Chief Secretary inyakla Banuo Z Jamir melener, shiba Nagaland Lokayukta ama kinungertem dena liasü.

## Wokha district terenlok asoshi Union Minister dang akhang



**Dimapur, Aami/June 16 (TYO):** Minister of State in-charge of Ministry of Science & Technology, Earth Science, MoS, Prime Minister's Office, & Ministry of Personnel, Public Grievances & Pensions; Dept. of Atomic Energy & Dept. of Space, Govt. of India Dr. Jitendra Singh-i June 16, 2025 nü Wokha district semdangba mapang Wokha district nungi assembly constituency pezü - 37 Tiyi A/C, 38 Wokha A/C, 39 Sanis A/C aser 40 Bhandari A/C - nungi NLA züngsem par pezü district nung terenlok maparen balala asoshi tezüluba ka agüja liasü.

37 Tiyi A/C nungi DY. CM & Minister i/c of Home, Border Affairs, Y Patton; 38 Wokha A/C nungi MLA Y. Mhonbemo Humtsoe; 39 Sanis A/C nungi Advisor, Dept. of Agriculture, Mhathung Yanthan aser 40

Bhandari A/C nungi MLA & Chairman SDPDB Bhandari, Achumbemo Kikon nungeri zülbua shiti nung Wokha-Merapani lenmang ya National Highway sangdongtsü khanga liasü.

Wokha-Merapani nungi Golaghat tashi lenmang ya Nagaland aser Assam sendaktepba lenmang tongtipang ka lir, ibai shishilempaba, senzüsemponga aser tongtipang services asoshi kanga tongtipang lir. Iba lenmang ya tongtipang süaka timtem balala ajurur, talisa anepalu mesüteter aser meyangluteter. Anungji iba lenmang ya National Highway ta sangdongba ajanga sorkari temulung agüja nüngdakba teyari agütsü aser tesendaktep aser rongsenketzung ainba nung kanga yaritsü, ta ashi.

Ano Wokha district aser temeket district tem nung alir asoshi Wokha-Bokajan Road ya

Wokha jila nung District Office Complex, Multipurpose Market Complex, Stadium aser approach roads amala kanga nungdaka lir. District headquarters nung ki o jen nüngdakba tem yanglutsüba ajanga Lotha nunger nütsüng yongsük 1.60 lakh (2011 census) lenmang balala nung ahangzüksü ta ashi.

Ano talisa Wokha district nung shiti ajanga nüburtem nem timtem agütsüba indanga parnoki shia liasü.

Asen natural heritage nung shiti ya tongtipang shilem ka lir. Ajisüaka nisung aser shiti tsüngta mepetmesü tali adokba ajanga ozü nüburtem timtem jenti ajurur. Anungji Government of India-i iba tebilemtsü süoki ia asadanga sentong tajung aser tejangja yanglua teyari balaka agütsüba ajanga iba tebilemtsü koktetsü, ta parnokisa ashi.

## GST bendenba nung Nagaland ya yakbangbo masü

**Dimapur, Aami/June 16 (TYO):** Nagaland State Tax Officers atema anogo pongu asoshi GST training June 16, 2025 nü Office of the Commissioner of State Taxes, Dimapur nung tenzükogo.

Sentong tenzük Commissioner of Taxes, Abhinav Shivam, IAS ajanga jembidang Addl. Commissioner, Issac R Kharkongor-i anir National Academy of Customs, Indirect Taxes & Narcotics (NACIN), Shillong nungi arua iba training agütsütsü mulungba atema pelaba lemsatepa liasü.

Nagaland nung tax administration system tashi itsitsü asoshi GST aser Enforcement nung training agiba ya tongtipang mera ka lir, ta pai ashi.

Goods and Services Tax (GST) ya tanen makai melenshir, anungji asenok update süa, training agir aser saksalema alitsü akhanger, policy melenshiba meteta alitsü nüngdaker ta ashi Tex revenue bendenba aser

pai ashi.

Tetsükdaktsü balala liaka tanem-tanemi department renloka aor. Tesüiba ita ti tsüngta capacity building nung temulung agüja ketdangsürtem Guwahati, Shillong, Kolkata aser New Delhi leni yoka training agidaktsür aser department balala nungi DDOs tem Kohima nung training agüja arur, GST inyakyim mittsü asoshi in-house tools ana yanglua lir aser ita shia indang osang bendentsü atema inyaktar, ta Abhinav Shivam-i ashi.

Department-i February 2025 nungi May 2025 tsüngta revenue arrears nung sen 10 crore ngutetogo, ta pai metedaktsü.

Anogo pongu asoshi shisalen sayur ya Addl. Commissioner, NACIN, Shillong, Issac R Kharkongor; Addl. Com, CGST, Dimapur, Sashi Wapang; CA, Raginee Goyal; CA, Ayush Saraf aser Asst. Com, CGST, Dimapur, S Krishnan nungertem alitsü.



## Kohima DPDB senden nung terenlok maparentem lepare reprangshi



June 16 nü DPDB Hall, Kohima nung Kohima DPDB senden amenba mapang tangokba noksa nung angur.

**Dimapur, Aami/June 16 (TYO):** Kohima District Planning and Development Board (DPDB) senden June 16 nü DPDB Hall, Kohima nung menogo. Iba seden nung MLA aser DPDB mendenbuba Kevipodi Sophie-ia shilem agia liasü.

Deputy Commissioner Kohima, B. Henok Buchem, NCS, shiba lenisüba nung iba senden agi, pai taoba senden nung sensaksebatem lepshia metedakja liasü. Tawa World Day Against Child Labour anogomung amungba indang süoka jembiba mapang DC-i ketcangsürtem dang child labour temzung ozüng sülen tashi anga anidaktsü nenshia metedaktsü. Paisa, arishi küm 14 tekubok aliba tanurtem mapa kecha nunga manioktsü aser arishi küm 14 nungi 18 tsüngda alir tainlonglongtem lendong aketba mapatem nung anioka minyakdaktsütsü tekümdangtsü metedakja liasü.

Senden nungsa Western Angami Public Organisation tir Kepelhoutuo Chüsi-i, administrative centre ya Sechü-Zubza nungi Peducha-i belener aotsü atema benoka liasü. SDO

Sechü-Zubza-i ken o asadanga benokba sülen jenjang tapet agitsü telemtetba agiogo.

Board-isa, June 21 nü nübutoka merekmeju sentong ka ayongzüktsü bangjem. Department balala telok tenet küma lemsatsü aser Kohima jila nung lenmang balala merektsü atema nongloksütsü. Iba sentong nung ward aser colony temia shilem agitsü aser Kohima Municipal Council mendenbuba incharge asütsü. MLA Kevipodi Sophie, den Deputy Commissioner aser Superintendent of Police nungeri mapatem asadangtsü.

Maneni senden nung CDPO Kohima Urban Reyivolu-i PowerPoint presentation ka agütsü aser Mission Poshan 2.0 kübok Social Welfare Department inyakyim metedakja liasü. Reyivolu-i anganwadi services, pre-school education, nutrition delivery, hygiene, aser capacity building amala onüktem ayimjema PowerPoint presentation ya agüja liasü.

Laisa, Mission Shakti kübok inyakyimtem indang metedaktsü koba Sakhi One-Stop Centres aser Beti

Bachao Beti Padhao inyakyim aser IGNOAPS, IGNWPS, IGNDPS, aser tientet rogotem, amitsür, aser persons with disabilities atema NFBS amala welfare schemes tem dak rangloker liasü.

Senden nungsa Legal Officer Mego-i, District Child Protection Unit indang metedaktsü. Mego-i organizational structure, 1098 child helpline, Child Welfare Committee, Juvenile Justice Board, aser Special Juvenile Police Unit indang osang tejangja agüja liasü.

Department-i mapa tajung inyakba tenüng sang agütsüba den DC-i Anganwadi Centre tem maneni kanga junga anepalutsü aser terenlok atema jenjang agitsü ajungshia liasü.

Ano senden nung Hopper's Society, Ranger's Club, aser E-Sports Association of Nagaland nung züngoksemtsü atema sensak asem aser agizüka jenjang tapet agitsü asoshi benokogo.

District Agriculture Officer dang taruba senden nung department inyakyim metedaktsütsü nongloksütsü.

## Mokokchung-ji nübur tangatetba... (TAPAK 1 NUNGI...)



Mangmetonglar Telongjem Mokokchung Golden Jubilee Nünge Ki MLA & Advisor Soil & Water Conservation, IPR Govt. of Nagaland Wb. Imkong L. Imchen-i lapoktsür kelen tangokba noksa.

Paisa Ao kinji pei sasa pei yariba kin, Aor dak arok ajungtsü asoshi bilemba aser inyakba shisatsü lir. Mokokchung Town-ji M. Bendangnükshi Longkumer Town Chairman aliba mapang nung Urban town küma yanglutsü tenzük aser iba nungjagi tenzük tanu asen town iba jenjang tongtetogota ashi.

Iba ki ya telemtetba tajung agia alima asoshi temoatsü abenba ki südakjang aser iba den külemei Aor ajak nüngtak nung amshitetba ki südakjangta Advisor Imkong-isa ashi

Imchen-isa Mokokchung jembiba den Mangmetong Village Council Chairman Wb. Watitemjen, Mangmetong Baptist Arago Pastor Dr. I. Lolen Imchen aser Mangmetong Senso Telongjem Mokokchung Tir Wb. Longriwati Imchen parnokia tepela o jembi aser Kr. Sütsüngkala Pongan ajanga ken tajung ka tena sentong nung adener ajungmesoba den iba sentong MTM Tongti Zülür Wt. Limasenla-i ketcangsü agia tatem nung telok külemei sarasader sentong tembanga liasü.

Iba ki meshiteta Rev. R. Tekai-i sarasadem aser Wt. T. Ayula Imchen ajanga lai zünga sarasader sentong tenzükba den MTM Tir Wt. Tekatsüngla ajanga tarur pela agizüka

## DoTE-i direct admission atema counseling indang metedaktsü

**Dimapur, Aami/June 16 (TYO):** April 4 nü sangdongba Government Administrative Approval aser April 25 nü office-i osang agütsüba dak sendakba nung Department of Technical Education-i sangdong ka ajanga qualified candidate tem dang, Engineering courses, Architecture aser B-Pharm nung private Institutions/Universities tem nung direct admission mesüra lateral entry atema counseling ka June 25 nü 10:00 ako nungi tenzük agitsü, ta metedaktsügo. Iba counseling nung shilem agitsü jangraratem ajak jaokogo aser tenüngdakba academic kuli kakettam bener arutsü metedaktsügo. DTE Nagaland den Empanelled Engineering Colleges aser Universities temi parnok Institutes/Universities atema counseling agitsü.

## NBSE-i CMMSF indang metedaktsü

**Dimapur, Aami/June 16 (TYO):** shilem agia takok angurtem nem tetushi agütsütsü.

Kaketshirtem dang tsürapur ka den parnok tang zünga aliba school/institution uniform semer arutsü, aser sentong agütsüba tesem nung 10 ako tashi nungbo mener atatsü mepeshia metedaktsügo.

Ken o dak sendaka alir ajak dang iba sentong nung shilem agitetsü magütsütsü osang CMMSF HSLC 2025 batch indang Whatsapp group nung June 16 nü tashi nungbo metedaktsütsü osang agütsügo.

Iba sentong nung Nagaland Chief Minister Neiphiu Rio-i

## Peren nung HSLC topcer tem nem tetushi agütsü

**Dimapur, Aami/June 16 (TYO):** 2025 HSLC tatidang nung Top 20 nung takok anguba kaketshirtem atema Zeliang Officers' Association Nagaland (ZOAN)-i ayongzüka tetushi agütsüba sentong ka district headquarter tasenba Peren nung Deputy Commissioner Office's Conference hall nung April 16 nü agiogo.

Sentong nung o jembiba mapang Deputy Commissioner Peren, Hiazu Meru-i, takok tajung angurtem nem parnoki lokti nem konang tetushi bener arutsüba atema tenüng sang agütsü. DC-isa, iba ya parnok indang career tetenzüker dang aser tarutsü nung tetsükdaktsütem aika ajangshia aotsü ta shia parnok dang item tetsükdaktsütem koktetsü aser tarutsü nunga takok tajung angutsü atema Tsüngrem nungi shisatsü meshitsü ajungshia liasü. Zeliang-isa, tang takok tajung anguba ya tatembang masü ta shia tarutsü nung tetsükdaktsütem aser takoktem ajangshia aotsü atema renemtsü ajungshia.

ZOAN-i temaba jenjang nung takok angurtem nem kuli kaket aser senpet agüja liasü. HSLC 2025 Topcer tem tenüng nungi Lungyihangle-ia o tatsüka jembi. Lai, iba sentong ayongzüka katsüba aser parnoki takok anguba reprangteta tushiba atema kanga pelaba lemsatep.

**FILM AND TELEVISION INSTITUTE OF INDIA, PUNE**

SHAPE 'YOUR DREAMS' WITH INDIA'S PREMIER FILM INSTITUTE

**MASTER'S DEGREE PROGRAMS & PG CERTIFICATE COURSES**

**ATEMA**

**ADMISSION LAPOKER**

FILM AND TELEVISION INSTITUTE OF INDIA, PUNE  
DEEMED TO BE UNIVERSITY UNDER DISTINCT CATEGORY  
UNDER SECTION 3 OF UGC ACT 1956

APPLICATION DEADLINE : 11 JULY 2025  
WRITTEN TEST : 27 JULY 2025

## Tanü putu ya tongbang raraba putu ka masü: PM Modi



June 16, 2025 nü Cyprus nung Ato kilonser Narendra Modi aser Cyprus Tir, Nikos Christodoulides nati Historic Centre of Nicosia semdangba mapang tangokba noksa nung angur.

**New Delhi, Aami/June 16** arrtsü adener kiralongra anema raraba nung Cyprus-i India pusema atema pelaba lemsatep. Christodoulides-i, "Akhidang nungi asenok tesendaktep kanga junga lir, aser iba tesendaktep nung temelung lemtip lir," ta ashi.

Lenir anati tang West Asia aser Europe nung raraba tensa atema tebilemtsü akaba lemsatep, aser tenapronglai tanü putu ya raraba putu ka masü, ta metedaktsü.

Christodoulides den külemi osangbenertem senden nung jembidang Ato kilonser Modi-i, "Ken o jembiba ajanga mangatettep ken otem ajak bentettsü aser tesünep alitsüji meimchirtem taginüba lir," ta ashi.

Ato kilonser Modi-isa India-i

tajungba akümtsü atema jembiba den külemi defence, security, trade, technology, healthcare, renewable energy aser climate justice atema linük ana tsüngda amalitepa inyakba aser regional onüktem nung o lemtipa liasü.

Modi-i, "Künapronglai West Asia aser Europe nung raraba tensa atema tebilemtsü akaba lemsatep. Item rara ajanga item regions nungi dang masü saka tanga regions-a kongshir. Iba putu ya raraba putu masü ta künati bangjemogo," ta metedaktsü.

Hombarnü Ato kilonser Modi aser Christodoulides na tsüngda amenba senden nungi India External Affairs Minister S Jaishankar, Foreign Secretary Vikram Misri aser National Security Adviser Ajit Doval

nungera liasü.

## Air India tayimtsü lendong nung asürtem 87 maitsü jangjaogo

**Ahmedabad, Aami/June 16** (Agencies): Ahmedabad nung Air India tayimtsü tsükoka lendong nung tayimtsü nung mena alirtem aser Medical College campus nung alir ajak senteper nisung 270 asüba sülen tang tashi nung DNA tetendangba ajanga asürtem 87 maitsü jangjaogo aser tasümgang 47 bo kinüngertem nem agütsüogo, ta Hombarnü kettadangsertemi metedaktsü.

June 12 nü tayimtsü tsükoka sülen mi tulu adoka arongba ajanga asürtem aika temang kanga mejungi rongsa.

Osangbenertem den jembidang additional civil superintendent, Dr Rajnish Patel-i, "Tang tashi nung DNA samples 87 jangjaogo aser tasümgang 47 bo kinüngertem ket nung agütsüogo. Asürtemji Gujarat nung Bharuch, Anand, Junagadh, Bhavnagar,

Vadodara, Kheda, Mehsana, Arvalli aser Ahmedabad district tem nungi lir," ta metedaktsü.

June 12 nikongdang Sardar Vallabhbhai Patel International Airport nungi tayimtsü apusoba sülen minute ka majungdang tsükoka lendong nung nisung 241 asü aser Medical college campus nung alirtem-a MMBS student pongu densema nisung 29 asü.



June 16, 2025 nü Srinagar nung BJP lenirtemi taoba mapang Gujarat chief minister, Vijay Rupani nem akhüm agütsüdang tangokba noksa nung angur. June 12, 2025 nü Ahmedabad nung Air India tayimtsü tsükoka lendong nung pa asü.

## Census mezüngbuba shilem Ladakh, J&K, HP aser U'khand nung agitsü

**New Delhi, June 16** (Agencies): Hombarnü Centre sorkari, 2027 küm India nung nütsüng züngdangba maparen 'census' tenzüksü aser mezüngbuba shilemji 2026 küm October 1 nü

Ladakh aser Jammu and Kashmir Union Territories, Himachal Pradesh aser Uttarakhand state tem nung tenzüksü, ta metedaktsü.

Linük nung tanüngba state tem nung 2027 küm March 1 nungi census tenzüksü.

Hombarnü Union Home Minister, Amit Shah-i Home Secretary, Registrar General & Census Commissioner of India aser tongti ketdangser kar den senden mena census atema terenemshiba jenjang asadanga liasü.

State shia nung census ji shilem ana lemsar agitsü. Mezüngbuba shilem kübok House Listing Operation dak

sendakba osangtem bendentsü aser tanabuba shiale nungji Population Enumeration (PE) aser kibong shia nung züngsemtem dak sendakba osang tejangja bendentsü. Tanabuba shilem nungjisa caste osanga bendentsü.

Taküm April 30 nü sorkari, taruba census nung linük nung castes aser sub-castes osangtem tejangja bendentsü, ta metedakja liasü.

India nung tesüsabuba Census agibaji 2011 küm liasü aser iba mapang nungjia census shilem ana lemsar agia liasü.

Tamalen Ministry of Home Affairs-i sangdong ka ajanga, "Population Census-2027 ji shilem ana lemsar agitsü atema telemtetba agiogo. Population Census - 2027 tenzüksü anogoji 2027 küm March ita mezüng anogo 00:00 ako nungi tenzüksü," ta metedakja liasü.



June 16, 2025 nü New Delhi nung India nungi G20 Sherpa, Amitabh Kant-i osangbenertem den jembidang tangokba noksa nung angur. Hombarnü pal G20 Sherpa menden nungi anenba metedaktsügo.

## SC-i tetuyuba agütsüba ama Angh RN Ravi-i meinyaker: MK Stalin

**Chennai, June 16** (Agencies): M Karunanidhi nüngtem nung University tasen ka amenoktsü atema benokba Bill ka state Angh, RN Ravi-i tang tashi magizükba atema Tamil Nadu Chief Minister MK Stalin-i sashia aitsü.

Hombarnü Chennai nung lokti senden ka nung jembidang MK Stalin-i, tawa Supreme Court obendang ka ajanga Anghtem tashi nokdangyonga Ravi-i memelenshir aser maneni Assembly nung agizükba bill tem pai nokdanger, ta metedaktsü.

Stalin-i, "Thanjavur nung University tasen ka amenoktsü atema ni sangdongogo. Nibo arendaka liasü saka party balala nungi lenirtemi university tasenbaji Kalaignar (M Karunanidhi) tenüng nung jaloktsütsü atema benoker. Onoki iba Bill ji agizükba sülen May 2 nü Angh dangi yokogo. Joko anogo 40 jungogo saka tang tashi pai magizükba," ta metedaktsü.

Chief Minister-isa, Angh nem aiben nenshia

metedaktsügo aser Higher Education Minister-ia iba bill atema jembitsü asoshi Angh ajurutsü asüngdang, ta ashi.

"Ajisüaka Angh-i mapang magütsür. Onoki iba bill indang jembitsü ta meteta Angh-i onok ajurutsü tsüber. Pa kechiba kanga mazüngi alirar Tamil Nadu nung nüburtemi metetner," ta Chief Minister-isa metedaktsü.

RN Ravi maneni aija Stalin-i, state sorkari maremzüktetra Angh nem kangshia iba bill ji agizüdkaktsüsa akümtsü, ta metedaktsü.

Tawa Supreme Court-i, Angh temi mapang telatet makai Bill tem soita mayutsüla, saka tekaraba nung inyaktsüla, ta oshidang agüja liasü.

Taküm April ita nunga Supreme Court-i Tamil Nadu Angh RN Ravi-i Assembly nung agizükba Bill 10 tashi soita ayuba atema pa aija liasü.

SC-i iba oshidang agütsüba sülen MK Stalin-i aniba DMK nung züngsemtemi firecrackers apokba den nanglong lemja benjungtepa liasü.



# TIR YIMYIM

## YIMOBILEM (EDITORIAL)

DIMAPUR TUESDAY, MAY (AAMI) 17, 2025

### Aluyimtsü atema tazünger nüngdaker

**A**shiko tanü tashi asenoki aluyimba mapa ya mazüngashir mapa amai bilema alitsüa akok, aji asenok tai masü, kechiyong akhi tsüraburtem mapang nungi aluyimba mapa ya school azüngertem asoshi masü saka mazüngertemi inyaktsüba mapa amato mesenmetua jembia aru. Aji oda, tsüraburtem pei kibong nung tasor temang kangtepa school züngdaktsüba ya alu mayimtsü asoshi school züngdaktsür amai ajungshia aru. Iba lagi school azüngertem asoshi aluyimba oset nok aser alulem mertsüng amshitsübaji mazümalem mapa amaika kuma adok. Tanü asenok ajak tazüngtashir kumer mapaa maka aser chiyongtsüa maka ta timatemba ya, talisa, alu mayimtsü aser mapa meinyaktsü tangatetba nung school azüngba nungi tenzükba timtem lir. Aji oda, tangarbo alu ayimtsü aser mapa inyaktsü atema school azünger saka asenokbo tsüraburtemi mapa meinyaktsü atema ajungshia school züngdaktsü aser school nunga lesson makokerbo aluyima alitsü ta tesayurtemi amokmerena lesson sayu. Tanü item tazüng tashitemetetremji asenok lir. Aji tesüngmangtsüka aser jungjunga biledangra temenünüsüka. Iba tangatetba nung lagi asenok tangsa tang meyiptü nüngdaker, kechiyong tanübo aluyimba mapa ya mazünger inyaktsüla mapas kümogo. Alemli asenok tsüraburtem aluyimba agi tebok masüng timatemba to, tanga agi masü, parnok dak tazüngtemetetba maliba agi alu junga meyimtetba tebilemtsü liasü. Aji oda, aluyimba agi parnok tebok mesüngtet timatemba agi par chirnurtema alumeyimdaktsünü bilem südi ta tangang rajemer. Ajisüaka, tanübo aluyimtsü asoshi dang masü saka ki aoktsü aser gari anitsü asoshia dena tazüngtemeteter nüngdaker, kechiyong mapa inyakba oset aser inyakyim ajak computer ajanga dang shia inyakdaktsür aser technology tapu balala amshia inyaker. Itemji tangar oshi agi ashir aser tangar oshi nung dang inyakyim züluja lir. Aji oda, tanübo ita anü kisüng repranga aluyimtsüba putu masü saka science-i kechi ashir aser technology osettem koma amshir, itemji angatet nung dang garia anitetsüba putu aser alua ayimtsüba mapang lir. Tanü putu nung mapa inyakyim ya kodang tazünger lanurtemi angatetdir, asen lima nung peisasa mapa inyaker meinyakma adoktsü. Tanübo aluyimba maparen ya tsüklü dang masü saka aonsutsü lu, sünganglijang lu, naro lu, rubber lu, kozü lu, süng lu, coffee lu, akhar lu, ango metsüba lu, longben metsüba lu aser kiset shiruru tapu balala metsüba lu ta nisungtemi achi-ajemba nüngdak ajak peridaktsütsü asoshi inyakba mapatem ajakji aluyimba mapa lir. Itemji kodang tazüng temetetremji mapa angazükdak bushia oagi angazüker inyak tenzükdir, idangjibo pei peri dang massaka tangar danga ayoktsüsa züsentettsü. Aji oda, aluyimba mapa tapu balala angazükdak tesem balala nung training agütsüdak lapoka lir saka item training-ji tangar oshi English mesüra Hindi nung agütsütsü, anungji tazünger aotsüla. Aji oda, kodang tazünger orr aluyimtsü angazüker arudir, pai mesüra lai anir aluyimtsü tenzüksü. Idangji dang asen lima nung rongsen moluteta takar akümtü. Atangji, aluyimtsü asoshi Agriculture, Horticulture, Fishery aser Animal Husbandry azüngsa tajungba saka itemji mazüngyonga tangar oshi zülütetba, züngtetba aser angatetba tazünger katibo ita ishika tangazükdak tesem kati orr aluyimba mapa angazüktettsü. Iba lagi tanü putu nungbo aluyimtsü mapa ya tazüng temetetremji mapa kümogo ta angatetdaktsüner. Aji oda, kodang tazünger kati nashi, ak aser an metsütsü angazüker mapa tenzükdir, idangjibo yimkong perir külenang tangalenia yoktettüsa metsütettsü. Kasaji tanga lu ayimba nunga tajangzük keta yimtettü. Aji oda, aluyimba mapa ya alu nung inyaktsübaji dang masü saka peii metsütetba aser züsentetbatemji alima tesem balala nung yoktettüsa lenmang bushia tongteprateptsü nüngdaker aser item ajakji tazüngertemji dang inyaktettsü. Item aluyimba mapatemji tazüngertemji kodang takok ngua inyaktetdir, asen lima nunga tanga lima nung ama aluyimtemji temeimtsüka masü jangratemtsüka aser tenükshitsüka akümtü. Idangjibo aluyimertem ki aser aluyimertem gari-sa tajungba asütsü.

# OLEMSABANG

## Nagaland Sorkar küm roker-ana tain akümer

~ L. Kika Pongener.

Nagaland State ngur taküm agi küm roker-ana (62 years) abensatsü. Nisung'er arishi kuma küm roker-ana tainji jokorla arishi küm talangba-ka ogo ta ashitsü. Küm roker-ana tain arishir nisung kiji kechisarena ajak nung teintet asütsüla. Nagaland sorkar küm roker-ana tain aküm tashi nung otsüsutsü sua tongtetba tongtipang mapa rongnung kiji 'Opposition maliba sorkar' ya asütsü. Aser joko tanem-tanemi opposition maliba sorkar sungjang atangba angur. Opposition maliba sorkar mezüngbuba sungjang atangbaji....Telok-tentet balalai sorkar anema lungkak aitba ya asütsü. Tanabuba sungjangji sorkar inyakyim agi nuburtem temulong masü sorkar anema ola adokba ya asütsü. Tasembuba sungjangji Asembly nung tatartemi telemtetba agiba mapa kuma meinyakteti mapang tatsüka tsüngda nung melenshitsüsa akümba ya asütsü. Pezübuba sungjangji sorkar dak nuburtemi tamang makatetba ya asütsü. Pongububa sungjangji asen lima nuburtemi yimlaba ama terenloktsü tim shitak merenlokba ya asütsü. Naga nunger Politics küm roker tema asaya-a arur....Opposition maliba sorkar tashi dang asayatetba ya tesungmangtsü-ka aser teshisadangtsü tuluka lir.....Ashiko, opposition maliba sorkar ya tangar lima nungbo malitsü sudi.

Aji oda, opposition maliba sorkar ya alima matsüngdang numadangtsü mapa ka amai nuburtemibo bilemer. Congress (INC)-i yimsu asüba mapang nunga opposition maliba sorkar ka ajangshia aruogo, saka iba mapangjibo tanga Party katia Nomination File masüba agi Congress Party den tetokteper mali opposition malitsüsa tensa tia bentsür aru. Tesuiba Peoples Democratic Alliance (PDA) sorkar nunga nujiso telemtetba 'Solution' agitsü nungdem nung opposition maliba sorkar khen yangluogo. Ano tang NDPP & BJP teloktepi aniba sorkar nunga nujiso 'Solution' ademer opposition maliba sorkar ka yanglur, joko küm asem shi sorkar anir arudagi. Ajiser, opposition maliba jagi asen lima aser nuburtem koba-teka takoksa angur (?) aji nuburtemi kanga junga asadangteta arudagi. Sorkar kati Assembly nung telemtetba agiba ajak nung nuburtemi temulong masü ola adoka lungkak aitba ya opposition maliba sorkar sungjang atangba tongtipangtiba rongnung ka asütsü ta nuburtemi asadangteter. Nujiso telemtetba agitsü ademer opposition maliba sorkar yanglu, saka nujiso telemtetba agitsüba nung opposition maliba jagi mapa kecha meinyaktettsü amai nuburtem-ibo bilemer aser tanü tashi nung inyaktetba balaka mangur.

Democracy yayim agi yimsu asüba sorkar ka nung 'Opposition Bench'-ji kangasa tongtipang lir. Democracy yayim agi yimsu asüba sorkar ka nung 'Opposition Bench' malibaji tongtipang shilem ka agi mabensa asütsü. Atangji, Centre sorkar-a suang, State sorkar-a suang opposition malibaji alima aser nubur atema kangasa takoksa tulu asütsü. Aji oda, sorkar inyakyim tim masüba nung opposition-i tashi-ita nunga ta ola adok-aka, maparen aika nung rulling sorkar jagi parnok mulungba nung attsür aor. Opposition liaka yamaji inyakernung, opposition tashi-tait ka melira, sorkar anema ola adoker aser metongshitsür melira, asen lima aser nubur kanga akoksatsü ta nuburtem-ibo kanga sasa-a bilemer. Ashiba, ama State ngur küm roker dak tali suia aor, anungji küm roker tema tain State ka nung Politician-temji kanga dang teintet aser takotet (Matured) asütsüla aser pei lima meimba Politician-tem asütsüla-a ta nuburtem-ibo yimlar. Ajisuaka tesasatsüka, sorkar nung 'Opposition Bench' malitsüsa aküm nungji, jokorla, mulongtet telok aser lokti-tentet (Stake Holders)-temji Opposition Bench shilemji agia tang amai tasü-ita ola adoktsüla aser nungdakra lungkak aittsüla....ta asünungdang sorkar inyakyim meshitakbaji metongshitsü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züldü  
bilemba ken-o ama tazünger i angateta agitsü mepishir

## Church of North India (CNI)-i ano tetsür ka Bishop Shimogo



June 10, 2025 nü New Delhi nung Church of North India (CNI)-i Rev. Neena Charan Bhopal Diocese nung Bishop Shimoga sülen tangokba noksa nung angur.

**June 16, 2025:** June 10, 2025 nü Church of North India (CNI)-i Rev. Neena Charan CNI Bhopal Diocese nung Bishop Shimoga; CNI nung tetsür Bishop tasembubaji la asütsü.

CNI Moderator, Rev. B. K. Nayak leniba nung New Delhi nung CNI Bhavan Chapel nung la putir mapa nung shimokba sentong agi. Kasa sentong nung Gujarat Diocese nungi Rev. Silvan Christian leniba nung Kibuba Benjung agi aser Patna Diocese nungi Rev. Francis Hansda-i Tsüngrem O jembia liasü.

CNI Synod nung Acting Deputy Moderator aser Neena Charan kinüngbu, Rev. Manoj Charan-i tepela o jembia liasü. Kasa sentong nung CNI Synod General Secretary Rev. Dr D. J. Ajith Kumar aser CNI Synod Treasurer Subrata Gorai nata liasü.

Bishop Neena Charan-i küm 12 dak tali Arogo nung tenziuka liasü. Iba sülen ita ka shi lir

aruogo. La Government's Girls' College nung undergraduate studies renemba sülen 2003 küm Allahabad nung aliba Satyaniketan Theological College nung Bachelor of Divinity renema liasü.

2013 küm Arogoi la Bhopal Diocese nung ordain süla liasü. Tang la Masih Mandir Church, Bhopal nung Presbyter-in-Charge teinyakdak.

Neena Charan kinüngbu, Rev. Manoj Charan ya Amritsar Diocese nung Bishop inyaker aser CNI Synod nunga Acting Deputy Moderator inyaker. Lar jabaso Yashab-a Kolkata nung aliba Bishop's College nung Bachelor of Divinity tezüngdak aser Synodical Youth Fellowship Committee nung Tir inyaker.

CNI nung tetsürtem rongnungi mezungbuba bishop shimbaji Rev. Violet Nayak lir. Yaküm May 22 nü CNI-i la Phulbani nung Bishop shima liasü. Iba sülen ita ka shi lir

June 25 nü Rev. Sushma Kumar-a Chhattisgarh nung Bishop shima liasü.

CNI-i sangdong ka ajanga, "Ordained Ministry nung tetsürtem-a züngoka tetsürtem nem tashi agütsütsü atema Arogoi tasü itta inyaker," ta metedaktsü.

1970 küm northern India nung Protestant denomination trok longjema CNI tenteta liasü. CNI puti otsü nung tang mezüng küm ka tsüngda tetsür asem bishop shimbaji. Iba ya ajanga tanga regional denominations nunga tetsürtem ordained ministry nung züngoktsü ajungshitsü akok.

Church of North India-i sangdong ka ajanga, "Bishop Neena Charan-i Bhopal Diocese nung wadang tasen nung ajemoka inyakdang Kibubai la nem maneni shisatsü aser tasütait tanela agütsütsü. Kibubai asenok atema sayatenya inyakogo," ta metedaktsü.

kümogo. Ano alu nung inyaktsü atema Kibubai aika adokdaktsüogo. Anungji Challenge 50 campaign ya ajanga makamaiter aika nem practical training agütsütsü, ta onoki amanger," ta metedaktsü.

London Seminary indang "Challenge 50" campaign kübok Seminary indang flagship Pastoral Training Course atema nisung 50 bendanga yaritsü.

London Seminary-i sangdong ka ajanga, iba campaign nükjidong ya UK nung pastor tem nem formal training agütsütsü atema lir, ta metedaktsü.

Taoba putu den medemdagra tangbo nisung ishikati dang ministry nung tenziütsü atema jangrar. Talisa London nung ministry nung tenziütsü jangartem kanga ajema kümogo.

London Seminary nung Principal, Bill James-i, "Training kanga junga agütsütsü kanga nüngdaka

London Seminary ya 1977 küm Dr. Martyn Lloyd-Jones leniba nung tenziüka liasü, aser iba mapang nungjagi tenziüka tesüiba küm aika tsüngda iba seminary nungi Arogo nung lenirtem tajung aika adokdaktsüogo.

London Seminary indang tongti mission ji Pastoral Training Course lir, ajisüaka kümtem süla arudang Seminary nung tetsürtem atema specialized courses tenziük, Arogo tasen tenziütsü atema course bendenlok aser Arogo nung lenirtem aser putirtem atema leadership training-a agütsür.

London Seminary nungsa Dr. Garry Williams leniba nung Pastors' Academy lir. Parnoki tang Arogo nung pastor teinyakdakpurtem atema programs balala agütsür.

London Seminary-i ano taruba küm 50 nung rangloker inyakdang Challenge 50 campaign ya ajanga UK nung Arogo nung tarutsü tia yangluba nung tongti shilem agütsütsü imlar.

## ANOGO ABEN TSÜNGREM DEN

### Ne mulungtet takang

Aser kodang pa temai adoka agizüktsü anogo abensa ya adok, pai Yirusalemi aotsü mulung mulunga pa tejak ilenji meyip. Luke 9:51.

Khristan taküm nungi atsüngzüka aotsü temela! Kodang Tsüngremi ne nem kechi inyakdaktsüner aji nai angatetta arur na meketa alir ajaki ne mapang aser teyari ajaki ama asütsü! Kodang Yisu asoshi kangki-i atutsü mapang tonga aru, pai pa tejak Yirusalem leni meyip, aji asü nungdang shingai Tebui mulungba menokdangtetsü. Pa temulungtet tejanga ngur Samaria nungeri Yihuda nunger ka parnok yim ajanga Yirusalemi aor bilema parnoki pa magizük.

Yisui pa tenyaba nungi matsüngzüksü mulungtet saka pai lemang nung aika tenziütsü mapang agi pai nütsüng neter temeket townsi yok (Luke 10:1). Pai chitemra akettertem anebsü (Luke 17:11-19). Temang waka shirangertem anebsü (Luke 14:1-4). Pai Zachariah kidangi tekümtet bener aru (Luke 19:1-10). Pai maneni nütsüngtem dang sayu (Luke 15:1-32). Yisu Kalvaryi atudang Pai tangar tenziütsü mesongtem saka Tebui mulungba nungi atsüngzüksü pai memelung.

Tsüngremi ne nem kechi inyakdaktsüner nai metetta lira, ibaji atalokdaktsütsü bendanga mulungtetter, ne tejak mulung mulunga iba tsütsü meyipang (A.Shin 4:25). Tangar matsüngdang na Tsüngremi aniba kuliji ne temulungtetbaji asütsü. Na meketa mapang tajungi (opportunity) Tsüngremi na ajaba alizüng nungi matsüngzükdaktsütsü kümdangang. Tatitangbai tashi angatsü menua tekümdaktsü mesüra tesentokdaktsü. Nai Tsüngrem nungi tejangja mapa agizük, ne tashi angaba nung mainshi inyaktsüla.

### China-i Arogotem dang Communist tenüng asangba ken atentsü tuyur

**June 16, 2025:** China nung Chinese Communist Party (CCP)-i Protestant Arogotem dang tekülem sentong nung atenba kentem nung communist sorkar tenüng asangba kenjang (lyrics) inoksemang ta tuyuogo, ta Christian Daily International (CDI)-i metedaktsü.

"Iba tetuyuba ajanga tebilemtsü akar, kechiyong iba tetuyuba ya tekülem sentong nung Tsüngrem tiyongtsü südaktsüba melen Communist Party ang tongtibang kümdaktsütsü atema tuyuba lir," ta CDI-isa metedaktsü.

Iba asalentong ya China nung 2025 küm atema renemba Sacred Music Ministry Blueprint dak sendakba sentong ka lir. Iba tetuyuba tasenba ajanga Khristan yimsü nung communism aser linük meimba aiddaktsütsü.

Iba tetuyuba tasenba nung ajemdaiker May 7, 2025 nü Arogo nung lenir 40 shi adenshia tekülem kentem nung CCP tenüng asangba züngoktsü atema jembishinüogoo. China sorkari melaba Protestant denomination indang Three-Self Patriotic Movement nungi züngsemtem aser China Christian Council nung züngsemtem iba senden nungi aden.

Osang angazükba agi, iba metedaktsü.

**AO OSHI ANGAZÜKDAK:****TANÜ ANGAZÜKTSÜBA OJANG**

Tir Yimyim

**Tenyatenko**


(adj) sorubangru, tenük telen (physique, physical appearance)

\* Tenyatenko ajungerbo temeimer aika alir.

**Tenyatenpong**

(v) nüngdak atema yokba (assign to run errands)

\* Nisung karbo tenyatenpong kanga bolur.

**OLONG PAITEP # 7184****TIPLÉN**

2. Süjeplok  
4. O agi merenshi  
7. Ayongküm li  
8. Chiyungtsümapang süiadok  
9. Tsüngrem den jembiba  
12. Saklok  
14. Samaba mebushitet  
15. Mejanga onú  
16. Tzü shiruru ka

**OLONG PAITEP # 7183 TELANGZÜBA****TIPLÉN :**

1. Semtu, 3. Lepko, 5. Bilem, 8. Ulu,  
10. Tsüngpang, 11. Tesangwa,  
13. Aoksa, 15. Putir, 16. Yipru.

**LANGTSÜNGLEN**

- (4) 1. \_\_\_\_ i  
- (5) 3. Kasa masü  
- (5) 5. Nuchi masü  
- (4) 6. Tashi endok  
- (9) 9. Langtem  
- (4) 10. Anü malidang  
- (5) 11. \_\_\_\_ kibur  
- (4) 13. Tebur tembar tsüngda jatepba - (4)

**LANGTSÜNGLEN :**

1. Sayu, 2. Teb, 4. Kimong,  
6. Lungkak, 7. Milak, 9. Zunga,  
10. Temopu, 12. Walu, 14. Ali.

**NAI-A YA METETTER MA**

Sweden nunger Olympic ana tashi nung pole vault asaya nung gold medal ngur alisang Armand 'Mondo' Duplantis-i pa indang world record ajateta ano otsü tasen ka yangluogo. Deobarnü Stockholm Diamond League nung pai 6.28 metres alemteta otsü tasen ya yangluo liasü. Duplantis-i world record ya 12benbuba yangluogo. February ita pai Clermont-Ferrand nung 6.27m alemteta otsü tasen yanglur aliba tang ano paisa ajatetogo. Otsü tasen yangluba den Duplantis-i Diamond League 41 nung 37benbuba takok nguogo.

Tanur asoba anogo nung salem osang den noksa angati adokdaktsünura - Tenüng, Küm, School, Talidak & salem osang tejangja zürür, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Goalpara nung ali bigha 1,555 azüngtetsüogo; kibong 600 dak kongshi

**Guwahati, Aami/June 16****(Agencies):** Assam nung Goalpara district administration-i Hombar anepdang Hasila Beel tesemi bulldozer 20 shi yoka ozüng alema sorkar ali atsünger aliba ali bigha 1,555 shi merektetogo.

Police temi teyari agüja kettangsürtemi kibong 667 shi anema jenjang agiogo, shirnoki ozüng alema sorkar ali atsünger liasü.

Deputy Commissioner Khanindra Choudhury-i anir district kettangsürtemi iba mapa ya anepdang 5 ako shi nung tenzük. Anogo tom tashi nungbo

kettangsürtemi mekazüka aliba tesem shilem 30 bo merekteter liasü.

Bulldozer temi ki, dukan aser arrstsü atsüa aika raksatsüogo aser iba den lower primary school pongu aser Jal Jeevan Mission project ka raksatsüogo, koba kettangsürtemi ashiba agi, temelaba makai yanglubatem liasü.

"Onoki yimzung nung dang iba mapa benoka inyakogo. Iba tesem nung alirtem timbai parnok temeden makai sorkar ali nung alir ta meteter liasü," ta Choudhury-i news agency ka dang ashi.

**Manipur nung police amakba atema nisung ana apu****Imphal, Aami/June 15****(Agencies):** Bishnupur district kubok Nambol Thongkha tesem nung longkak aitba mapang police office tejen ka aser police personnel ka dak teka sangshiba atema Manipur police-i Arambai Tenggol zuungsem ana puogo.

Manipur police-i ashiba agi, Langpok Makha Leikai, Bishnupur District nungi Ngangom Nganthoi (18) aser

Nambol Makha, Bishnupur District nungi Asem Amujao na parnok kidang nungi pua benerogo.

June 9 nü Nambol-PS, Bishnupur District kubok

Nambol Bazar nung Arambai Tenggol (AT)-i ayongzükba longkak aitba sentong nung nüburtem senshidaktsüü merangba mapang mangatetep adoba sülen police officer tejen ka aser police personnel ka kanga mejungi yirutsüba ken o nung aija asangur chanu ana ya pua liasü.

Tenaprongla ya Arambai Tenggol (AT) zuungsem liasü.

Bishnupur police-i Bharatiya Nyaya Sanhita (BNS) kubok ken o ka benokogo, kong sections 189(5), 191(1), 190, 195(1), 223(a), 109(1), 118(1), aser 351(2) densema lir, koba

duty mapang tetsüdkaktsü

agütsüba, public servants dak teka sangshiba, ozüng alema lokti adenshiba aser yirutsüü merangba dak sendaka lir.

Bishnupur district kubok Nambol Thongkha tesem nung longkak aitertemi police amakba mapang Additional Superintendent of Police (ASP) aser pa indang squad nungi zuungsem ka yirua liasü.

Central Bureau of Investigation (CBI)-i tawa parnok lenir Asem Kanan apuba dak sendakba nung Arambai Tenggol-i state ajunga nung longkak aitsü ayongzüker agiba mapang iba lendong ya 11:20 ako meta ataloka liasü.

**Manipur Angh-i state nung COVID-19 jenjang asadang****Imphal, Aami/June 15****(Agencies):** Manipur nung Deobarnü nisung 13 dak COVID-19 tashidak putetba sülen Manipur Angh Ajay Kumar Bhalla lenisüba nung Hombarnü Raj Bhavan, Imphal Conference Hall nung tensa asadangtsü atema senden ka menogo.

Iba senden nung Chief Secretary, State Health Department nungi medical kettangsürtejentem aser tanga kettangsürtemi shilem agia liasü.

Ministry of Health and Family Welfare (MoHFW), Government of India-i tetuyuba agütsüba sülen iba senden mera

liasü. COVID-19 tashidak poktetshia tanaben ayimsüngä prokshia aotsü akok ta süoki ia bilemba mapang tashidak den raratsü atema tajungba renemshia atatsü asoshi iba senden amentsü tuyua liasü.

Kettangsürtemi Angh dang sample 66 tendangba nungi 13 dak COVID-19 tashidak putetogo ta ashi. Tashidak puteter ajak dang kidang lokti nungi pila alitsü atema tetuyuba agütsüogo aser kasa mapang nung Health Department-i maneni contact tracing inyakyim benoka inyakdar.

Angh nemsa state sorkar renema aliba indang metedaktsüogo, kong

diagnostics, protective equipment, oxygen supply, ICU aser isolation ward tem, tenüngdakba mozütem aser IDSP-IHIP portal ajanga update asüba densema lir.

Testing capacity, medical supply tem aser mozükitem renemshia aliba amala tetsüdkaktsüem dak sendakba ken o tema sensaksemog.

Angh-i, COVID-19 poktetshia nunga state takokba tashi renemer atatsü atema jenjang tapet agitsü, medical infrastructure shidak amenoka atatsü aser nüburtem nem tangzükba agütsüü kodang tongtibang iba indang lemsatepa liasü.

Taoba küm ana tsüngda kettangsürtemi iba tesem azüngtetsü atema aiben osang agütsüogo, kong tesüa June ita 14 nü June 15 nü tashi nungbo ali azüngtetsü atema tetuyuba agütsüba densema lir.

Osang agütsüba sülen kitem raksaja maru tsüngda kibong 20 nungi 25 tsüngda pei mulungka nung iba tesem toktsüogo. Ajisüaka parnok timba ka mainshi aser ibayongji district-i tashiyim amshitsüa aküm.

Yimzung nung dang inyaksangshitsü nangzükaka iba inyakyim ajanga nüburtem jashidaktsüogo. Iba tesem nungi mintokba kibongtem rehabilitation maliba aser iba inyakyim yaki lokti nung nütsüng agi ajema aliba telok dak dang rangloker inyakba indang ashishiogo. kari ashiba agi, parnok iba tesem nung 1950s nungi alir aser parnok ket nung parnok lisopur ta kuli agütsüü atema NRC kuli kaket lir.

Iba tesem nung alirtemisa parnok nem mapang atsüra agütsü ta ashiba den iba ajanga aayangertem aser tekübokba jenjang nung aliba kibongtem renemtsü mapang mongui liasü.

Kasa mapang nung kaketshirtem tatidang agiba teyalong nung school ki dena raksatsüba ajanga süoki ia bilemba tali kümdar.

# Iran-i nuclear nok-nü yanglutsü tebilemba mali: Tir Masoud

**Tehran, Aami/June 16 (Agencies):** Tehran-i nuclear nok-nü yanglutsü tebilemba mali saka nuclear energy aser research indang tashi bushitsü ta Iran Tir Masoud Pezeshkian-i Hombarnü ashi.

Supreme Leader Ayatollah Ali Khamenei indang religious decree nung 'mass destruction' indang nok-nü yanglutsü amshiba nokdanga lir, ta pai nenshia ashi.

Parliament nung jembidang, "Parnok mena yur Iran-i nuclear nok-nü meyanglutsüla ta ashir, saka asenokia item nok-nü yanglutsü tejangraba kecha mali," ta pai ashi, koba Israel aser anüolen linük temi akhi mapang nungi Tehran-i nuclear nok-nü yanglutsü meranger ta tai tonglokja aruba indang athishir ama liasü.

Tehran-i nuclear programme ya civilian mapa atema kisüng lir ta shir.

Iran indang uranium enrichment nokdangtsü asoshi tezungzütepset ka yanglutsü aliba US Tir Donald Trump-i 2018 küm yutsü. Tezungzütepset tasen ka yanglutsü meranga US aser Iran ya April ita nungi senen ponguben menogo. Senden trok buba Deobarnü amentsü liasü, saka Israel aser Iran tsüngta tensa tamajungba akumba ajanga athi.

Kasa mapang Iranian Foreign Ministry odongtar Esmaeil Baghaei-ia linük parliament-i Nuclear Non-Proliferation Treaty (NPT) nungi ainshitsü asoshi bill ka

yangluba mapang lir, ta Hombarü ashi. Ajisüaka 'weapon of mass destruction' yangluba Tehran-i maneni anema nokdaker, ta paisa nenshia ashi.

Kasa mapang Israel aser Iran kati ka dak yasüng nungi tanep tashinung maneni maketepe akhi mapang nungi tsükchir linük ana tsüngta mitkartem rara maneni lir.

Iran-i Hombarne Israel amakba nung nisung ti asü aser ter dak tema yiru ta ketdangsür temi ashir, aser Tehran-i ashiba agi, Israel-i yasüng military aser civilian targets nung amak.

Tsükchir linük ana tsüngta anogo pezü maketepe nung asür nisung 250 tajunger lir.

Amakba sülen o tamajung jembiba ajanga tangbo iba mepetmesü anentsü teimla mangur aser rara ya tuluba ang kuma aotsü ama ajiteter.

Hokulbarnü nungi tenzüka Israel-i Iran indang military aser nuclear infrastructure nung kanga sashia amakba nung nisung 224 shi tepsetogo aser Iran-ia tayang kepzüka missiles 100 shi khaloktsügo aser ano tayang kepzüksü nangzüka lir.

Israel nung state broadcaster Israeli Army Radio ajanga nisung ti tepsetogo ta ashir - central part nung pongu aser Haifa yimti nung asem.

Anungji anogo pezü tejakdang Iran nung tayimtsü amshia amak tenzüker Israel nungi asür 20 dak tema ajunger.

Nisung 300 dak tema yirua lir ta ashir.

Tel Aviv nung United States Embassy indang branch ka tera raksago, ta US Ambassador Mike Huckabee-i ashi.

Aji masüdang Israel-ia Iran nungi maka liasü. Israel military ajanga ashiba agi, par jets temi Tehran nung Quds Force indang command centres ishika nung amak. Quds Force ya Islamic Revolutionary Guard Corps (IRGC) indang elite arm lir aser Iran alema oa bendang lima nung military aser intelligence operations agir.

"Item command centers nungi Quds operatives temi Middle East nung Iranian Regime indang proxies amshia State of Israel amaker," ta parnoki X post ka nung zültsü.

Deobarnü Israel-i oil refineries amak aser iba mapang IRGC indang itdangiter tekolak tepset aser nisung aliba tesemtem nunga amak, ta Iran-i ashik.

Hokulbarnü Israel-i Iran indang nuclear aser missile facilities tem maka mitkar tanishir aser scientists tem tepsetba sülen alima nung linük timbai aremzükteptsü ajungshia arur.

Onok aliba amokmerentsüa Iran-i nuclear nok-nü yangluba nungi nokdangtsü asoshi nüngdakba mera agir, ta Israel-i ashir.

Iran-i tayang kepzüka ballistic missiles khaloktsü aser

iba sülenbo linük ana tsüngta tanen makai maktepa arur.

Deobarnü US Tir Donald Trump-i tsükchir linük ana tsüngta tezungzütep ka yanglutsü imlar ta ashi, saka parnok mezüng raratsüla ta ashi.

Israel tembar tajung Trump-i linük ana tsüngta iba mepetmesü tenzükba sülen o belenshia jembir aser rara tuluba akumtsü akok ta shir.

Israel mitkar inyakyim nung US-i benjatsür aser tayang kepzüka Syria aser danga tesem

(Maneni tapak 8 nung...)

## OFFICE OF THE RIONGSANGER PUTU MONGSENYIMTI

P.O.CHUCHUYIMLANG - 798614  
MOKOKCHUNG; NAGALAND.

### SANGDONGER

Mongsenyimi Laishir Telongjem (MLT) tasüt asalentong ajanga Mongsenyimi nung teputep tesüne yimjung apula mapa tulu inyaka yimkong nung Tsüngrem yimli teronem adokdakja yimtisanger tzüratem mapa rongnung tajungtiba ka molutetsüogo. Mongsenyimi Putu menden aser Wb. S. Maongkaba Ozüküm tsüngda taoba 14th NLA Yimsüsür shimba maparen nung keno kar ajanga mapang tatsüka Wb.S.Maongkaba Ozüküm Mongsenyimi Senso temeten magiteti lia arur, MLT ajanga taraktep sentong ka 5 June 2025 anogo nung agiogo. Yamaji Mongsenyimi Putui pa nem yimli tatok tulu agüja tang nungi pa taraktak kecha melii Mongsenyimi Senso tajung ka ama amalitepa sobalibaa aotsü jungshitepa Tsüngrem tenüng sanga meyong nemzünga yuogo.

Iba tatemptazüng sentong nung kulisürtem:

1. Mongsenyimi Laishir Telongjem
2. Mongsenyimi Rionsanger Putu Menden
3. Mongsenyimi Senso Mungdang
4. Wb. I.Meyionen Jamir
5. Mongsenyimi Baptist Arogo
6. Mongsenyimi Senso Dr. J. R. Bailey Mission
7. Pangsong Menden Mongsenyimi
8. Wb. S.Maongkaba Ozüküm

Sd/-  
(AOSUNGIT)  
Chairman

Sd/-  
(MAPUTEMJEN)  
Secretary  
Rionsanger Putu Mongsenyimi

## BLA-i Pakistan army dak ama, sepai pezü tepset

**Islamabad, Aami/June 16 (Agencies):** Baloch Liberation Army (BLA) telungpuri Zamuran aser Panjgur nung Pakistani army dak ponguben amakdang Pakistan army pezü tepset, ta BLA ajanga sangdong ka nung ashi.

Item operations mapang Pakistan army indang surveillance systems raksatsü, ta ashi.

BLA sangdong ajanga ashiba agi, parnoki mezüngbuba nung Zamuran kübok Dashtok Bamblo region nung Pakistani army personnel dak amak. Ano Zamuri sector nungya parnoki remot-controlles IED amshia Pakistani army dak amak, shirnok tzü atarba mapang iba lendong ya atalok.

Maneni BLA fighter temi taoba hopta Zamuran nung aliba Sah Dem area nung Pakistan army temi par encampment anasa surveillance camera tem yua aliba raksatsü. BLA züngsemtem mitttsü asoshi Pakistani army temi quadcopter ka amshia liasü, koba raksatsü, ta parnoki sangdong nungsa ashi.

Taoba Hokulbarnü BLA-i Panjgur nung aliba Chitkan region kübok Kalam Chowk

## GOVERNMENT OF NAGALAND OFFICE OF THE LABOUR COMMISSIONER

NAGALAND: KOHIMA  
New Capital Complex

//

Dated Kohima, the 12th June, 2025.

### ADVERTISEMENT

In pursuance with the approval of the Government vide letter No.LAB-14/1/2015-16(Vol-I) Pt dated 2nd June, 2025, applications are invited from qualified candidate to fill up the following post in the Labour Department:

1. 2 (two) posts of Drivers for which applications from indigenous candidates of Naga's
2. 2 (two) post of MTS from the qualified candidate from the indigenous of the Naga's of Dimapur district.

The last date for submission of forms will be within 2 (two) weeks from the issue of this advertisement. Detail information can be downloaded from the Department website <https://labour.nagaland.gov.in>.

Sd/-  
(Er. S. L. WATIAIER)  
Labour Commissioner  
Nagaland, Kohima.

## GOVERNMENT OF NAGALAND DIRECTORATE OF TECHNICAL EDUCATION

NAGALAND : KOHIMA - 797004

NO.DTE/COUN-IST/ 1/2024/ 7452

Dt. Kohima, the 12th June, 2025.

### NOTIFICATION

In pursuant to Govt. Administrative Approval NO.HTE/27-7/2016/343 Dt. 4th April, 2025 and in continuation to this office's Notification dated, 25th April, 2025, the qualified candidates are hereby informed that the Department of Technical Education will be conducting counseling for direct admission to degree or lateral entry to the private Institutions/Universities in Engineering courses, Architecture and B-Pharmon 25th June, 2025, time : 10.00 AM onwards at the Government Polytechnic Kohima, towards Indira Gandhi Stadium, Kohima. Therefore, the interested candidates are invited to the said counseling with all necessary academic documents. The Empaneled Engineering Colleges and Universities with DTE Nagaland will conduct counseling for their respective Institutes/Universities.

Sd/-  
(Er. VIPULHOU LHOUNGU)  
Director

## BAMD-i mezüngbuba Mokokchung inter-school basketball asayamung ayongtsü

**Mokokchung, Aami/June 16 (TYO):** Nagaland Basketball Association (NBA) aküm nung Basketball Association Mokokchung District (BAMD)-i mezüngbuba Mokokchung Inter-School Basketball Tournament ka taruba ita July 10-12, 2025 tashi ayonga akatsü, ta BAMD pur sangdong ka ajanga metedakstsüogo.

Iba asayamung ya "forging future" omen dak rangloker lanur sempet akertem anitena basketball asaya tera tonga ia rentsütsü BAMD pur nükjidong.

Iba asayamung ya Mokokchung district kubok aliba High School aser Higher Secondary School ajak asoshi

lapoka yutsür. Tejangrar school-tem ajak iba asayamung nung pela shishia jaoker aser shilem agitsü ajungshir, ta tayongerisa metedakstsü.

Iba tournament asoshi shilem agitsü jangrar school kari danga coaching teyari nüngdaka asüngdangra, BAMD-i yariteptsü mulunga lir. Iba asayamung nung shilem agitsüpur atema tayongertemi tanendak (lodging) reprangtsütsü saka chiyungtsübo school-temi peisasa anepalutsü, ta parnokisa metedakstsü.

Mokokchung sporting calendar nung züngoktsüsa iba asayamung ya kümshi ayongba running trophy ka südakstsütsü BAMD nükla lir. Iba mapatong

ajanga district nung aliba lanurtem saisabong tsütsü maongka ngua tejakleni aotsü imlar, ta parnokisa metedakstsü.

Registration dak sentakba, asayamung temzüng, fixture aser tanga nüngdakba osangtem shilem agitsüpur nem mapangtong nung metedakstsütsü. Iba

asayamung nung shilem agitsü jangrartemi Basketball Association Mokokchung District ketdangsür den tongtepratepangma. Iba asayamung takok ngua ayontettsü asoshi school-tem nungi jangrabangra aser nübur nungi teyari imla-a atar, ta parnokisa mepishia metedakstsü.

ATP rankings: Taylor Fritz maneni 4buba nung lir



Taylor Fritz

career nung rankings tajungtiba lir. Pai iba jenjang ya taoba küm November ita ajangzükteta liasü. Ajisüaka clay court season nung asayamung pezü nung asaya asem dang akokba sülen pa asepzüka lur liasü.

Taoba ita Fritz, French Open nung mezüngbuba round nung tsükatok. Pai mezüngbuba round nung Daniel Altmaier makok aser ibayongji pa tenetubai asepzüka alu.

Fritz ya temaba jenjang nung aliba Jannik Sinner, Carlos Alcaraz, aser Zverev nunger sülen pezübuba nung lir.

Jack Draper trokubai luogo aser Lorenzo Musetti shiba taoba hopta metoktepi liasü, pa tenetubai luogo.

America nungersa Ben Shelton, Stuttgart nung semifinals tonga asayaba sülen pa indang career nung tang mezüngbuba Top 10-i iogo.

### ATP rankings:

|                     |       |                 |
|---------------------|-------|-----------------|
| Jannik Sinner       | (ITA) | 10,880 pts,     |
| Carlos Alcaraz      | (ESP) | 8,850 pts,      |
| Alexander Zverev    | (GER) | 6,500 pts,      |
| Taylor Fritz        | (USA) | 4,735 (+3) pts, |
| Novak Djokovic      | (SRB) | 4,630 pts,      |
| Jack Draper         | (GBR) | 4,550 (-2) pts, |
| Lorenzo Musetti     | (ITA) | 4,470 (-1) pts, |
| Tommy Paul          | (USA) | 3,470 pts,      |
| Holger Rune         | (DEN) | 3,440 pts,      |
| Ben Shelton         | (USA) | 3,170 (+2) pts, |
| Daniil Medvedev     | (RUS) | 3,140 pts,      |
| Alex De Minaur      | (AUS) | 3,085 (-2) pts, |
| Frances Tiafoe      | (USA) | 2,990 pts,      |
| Andrey Rublev       | (RUS) | 2,920 (+1) pts, |
| Arthur Fils         | (FRA) | 2,920 (-1) pts, |
| Casper Ruud         | (NOR) | 2,905 pts,      |
| Jakub Mensik        | (CZE) | 2,322 pts,      |
| Francisco Cerundolo | (ARG) | 2,285 pts,      |
| Grigor Dimitrov     | (BUL) | 2,205 pts,      |
| Ugo Humbert         | (FRA) | 2,195 pts.      |

### BENDANGLI OSANG : Tapak 7 nungi...

#### Iran-i nuclear nok-nü yanglutsü...

Iran-i yasüng missile amshia amakdang Israel nunger civilian tem tepsetba asoshi

Tehran nung alir temi taa agitsü, ta Israel Defence Minister Israel Katz-i Hombarnü tekumdangtsü ashi.

"Tehran nungi asükumba dictator nungi tasü maitnisung tepseter kumogo, aser par tashi ajemja amakba nungi Israel mitkar tem nokdangtsü meranga asaa Israel indang civilian kidang amaker," ta Katz-i pa indang Telegram channel nung zülu. "Tehran nung alir temi iba taa yakta menoktsü."

Kasa mapang Iran Tir Masoud Pezeshkian-i nüburtem dang metokmeperi yutsür Israel anema nokdakba

targets tem meraksatsü tashi tashi taitba aser tesashiba nung amaktsü, ta ashi.

Iran Foreign Minister Abbas Araghchi-i sandong ka nung Israel-i amakba anen dang ang Iran-i telangzüba agütsüba anentsü ta ashi.

IRGC-i official IRNA news agency ajanga sangdong ka

nung, Israel nung tongtipang

targets tem meraksatsü tashi

tashi taitba aser tesashiba nung

anema asenok tasü ita telungjem nung nokdaktsüla," ta

pai parliament nung jembidang ashi.

### BILEMDANGANG

"Anogoshiaji mapa tajung inyaktsü maongka tajung kaka lir."

## Bournemouth-i France nunger defender Truffert alizükogo



**Aami/June 16, 2025**

**(Agencies):** Bournemouth-i Rennes nungi France nunger defender Adrien Truffert pound million 14.4 agi alizükogo.

Arishi küm 23 tain France nunger left-back yagi küm pongu atema tenangzüktepba ka yangluogo.

Tenangzüktepba nung pound million 11 fee aser pound million 3 add-ons densema lir aser Rennes-i 10% sell-on

clause ka benokogo.

Kasa mapang nung Bournemouth defender Milos Kerkez Liverpool nung adentsü atema sensaksemdar.

"Iba ya ni maneni tejakdangi aotsü aser project tongtibang ka nung shilem agitsü atema maongka tajung ka lir," ta Truffert-i ashi.

"Mezung sensaksemdar mapang nungi club-i kü dak temulung alemba ni meteta aru

asera asaya tenzüksü yongyaseta atar," ta paisa shisem.

Truffert 2020 küm Rennes indang first-team nungi mezüngbuba asaya aser pa iba club nungi 212 ben asayaogo. Pa iba club captain liasü.

Pa France team nunga youth level nungi asaya tenzük aser 2022 küm senior team nungi mezüngbuba asaya liasü.

"Onoki mapang tatsüka Adrien nükshia aruogo, pa arishi küm 23 dang süaka pai team-i tajangshiba aika bener arutsü," ta Bournemouth president of football operations Tiago Pinto-i ashi.

"Adrien den inyaktsü onok yongyar aser iba amala asayar tajung ka onok den densemba atema kanga pelar," ta paisa ashi.